

四庫全書

子部

欽定四庫全書

太平御覽卷一百五十五

宋 李昉等 撰

州郡部一

叙京都

叙京都上

釋名云都者國君所居人所都會也

左傳曰邑有先君宗廟之主曰都

尚書大傳曰十邑為都

尚書曰建邦設都

又曰成王在豐欲宅洛邑使召公先相宅作召誥惟太保先周公相宅厥既得卜則經營

毛詩文王受命有此武功既伐於崇作邑于豐

周禮大司徒以土圭之法測土深正日景以求地中

又曰四縣為都

又曰距國五百里為都

公羊傳曰京師者天子之居也師者衆也京者大也天子之居必以衆大之辭言之

白虎通曰京師者何謂也千里之邑號也明什倍諸侯法日月之徑千里或曰夏為夏邑殷為商邑周為京師帝王世紀曰天子畿方千里曰甸服服之內曰京師又曰天子所宮曰都

風俗通曰丘之絕高大者為京謂非人力所能成乃天地性自然也京師義亦取此

帝王世紀曰宓戲為天子都陳在禹貢豫州之域西望
外方東及明緒於周陳胡公所封故春秋傳曰陳太昊
之墟也於漢屬淮陽今陳國是也神農氏亦都陳又營
曲阜故春秋稱魯大庭氏之庫黃帝都涿鹿於周官幽
州之域在漢為上谷而世本云涿鹿在彭城南然則上
谷本名彭城今上谷有涿鹿縣及蚩尤城阪泉地又有
黃帝祠皆黃帝戰蚩尤之處也或曰黃帝都有熊今河
南新鄭是也少昊氏自窮桑登位故春秋傳曰世不失

職遂濟窮桑登帝在魯北後徙曲阜於周為魯在禹貢
徐州蒙羽之野奎婁之分降婁之次周以之封伯禽

春秋傳曰命伯禽而封少昊之墟是以書叙稱魯公伯
禽宅曲阜是也顓頊氏自窮桑徙商丘於周為衛在禹
貢冀州太行之東北踰崇山及兗州桑土之野營室東
壁之分豕韋之次故春秋傳曰衛顓頊之墟也謂之帝
丘今東郡濮陽是也帝嚳氏都宅今河南偃師是也禹
貢外方之城嵩之北或言在梁非也帝堯氏始封於唐

今中山唐縣是也堯山在焉唐水在西北入唐河南有
望都縣山即堯母慶都之所居也相去五十里都山一
名頭山北登堯山南望都山故名其縣曰望都而地里
志堯山在唐南山中張晏以堯山實在唐東北望都界堯
都之徙涿鹿世本云在彭城南今上谷郡北自有彭城
非宋彭城也後又徙晉陽今太原縣是也於周禮在并
州之域及為天子都平陽於風詩為唐國武王子叔虞
封焉更名唐故吳季札聞唐之歌曰思深哉其有陶唐

氏之遺民乎帝舜其所營都或言蒲阪即河東縣

帝王世紀曰夏鯀封崇伯故春秋傳曰謂之有崇伯鯀國在秦晉之間左氏傳曰趙穿侵崇是也禹受封為夏伯在禹貢豫州外方之南角氏之分壽星之次於秦漢屬潁川本衛地今河南陽翟是也受禪都平陽或在安邑或在晉陽於漢平陽安邑皆屬河東晉陽屬太原在冀州太行恒山之西太原太嶽之野叅代之分實沈之次於周為晉今司隸并州之域也相徙商丘於周為衛成公

夢康叔曰相奪予享是也少康中興復還舊都故春秋傳曰復禹之迹不失舊物是也世本又言夏后居陽城本在大梁之南於戰國大梁魏都今陳留浚儀是也按經傳曰夏與堯舜同在河北冀州之域不在河南也故五子歌曰惟彼陶唐有此冀方今失厥道亂其紀綱乃底滅亡言自禹至太康與唐虞不易都城也然則居陽城者自為禹避商均時非都也故戰國策稱桀之居左天門之險右天谿之陽成臯在其北伊洛在其南吳起

對魏武侯亦言桀之居左河濟右太華伊闕在其南羊腸在其北按地理志至上黨商都有天井闕即天門也有羊腸坂在太原晉陽西北九十里為通西上郡關即吳起之所云也

帝王世紀曰商契始封於商在禹貢太華之陽上洛商是也世本契大居番相徙商丘本顓頊之墟故陶唐氏之火止闕伯之所居也故春秋傳曰闕伯居商丘祀大火相因之故商王大火謂之辰故辰為商星今濮陽是

也然則契之所封商丘商洛是也商土於周為衛商是也而學者以商丘為契封謬矣湯始居亳學者咸以亳本帝嚳之墟在禹貢豫州洛河之間今河南偃師西二十里尸陽之陽亭是也以為考之事實甚失其正孟子稱湯居亳與葛為鄰按地里志今梁國寧陵之葛鄉是也湯地七十里葛又伯耳封域有制葛伯不祀湯使亳衆為之耕有童子餉食葛伯奪而殺之計寧陵至偃師八百里而使亳衆為耕童子餉食非其理也今梁自有

二亳南亳在穀熟北亳在蒙非偃師也故古文仲虺之
誥曰乃葛伯仇餉初征自葛即孟子之言是也湯又盟
諸侯於景亳然則二亳皆在梁矣春秋會于亳是也太
甲既立不明伊尹故諸桐世本又言太甲從上司馬
在鄴西南按詩書太甲無遷都之文桐宮其在斯乎仲
丁徙囂或曰今河南教倉是也故書序曰仲丁徙于囂
河亶甲徙相在河北故書序曰河亶甲居相是也祖乙
徙耿為河所毀故書序曰祖乙圮于耿今河東有耿鄉

是也及盤庚立復南居亳之殷地故書序曰將治亳殷
今偃師也然則殷有三亳二亳在梁國一亳在河南南
亳偃師即湯都也蒙為北亳即景亳湯所盟地偃師為
西亳即盤庚所徙者也故立政篇曰三亳阪尹是也武
丁徙朝歌於周為衛今河內縣也紂自朝歌北築沙丘
臺沙丘地理志在鉅鹿東北七十里邯鄲國屬趙於禹
貢在冀州大陸之野昂畢之分大梁之次至今民俗歌
謠男女淫縱猶有紂之餘風世稱趙女之美是也

又曰周后稷始封郃今扶風是也及公劉徙居邑於豳
今新平漆之東北有豳亭是也故詩稱篤公劉于豳斯
館至太王避狄循漆水踰梁山徙邑於岐山之陽西北
岐城舊址是也故詩稱率西水滸至於岐下南有周原
故始改號曰周王季徙郢故書序曰維周王季宅郢是
也故孟子稱文王生於畢郢西夷人也暨文王受命徙
都於豐在今京兆之西是也故詩有云既伐於崇作邑
於豐及武王伐紂營洛邑而定鼎焉今洛陽西南洛水

之北有鼎中觀是也周公相成王以豐偏處西方貢道不均乃使召公卜居洛水之陽以即土中故援神契曰八方之廣周洛為中於是遂築新邑營定九鼎以洛邑為王之東都故周書有曰我乃卜澗水東瀍水西唯洛食是為王城名曰東周故公羊傳曰王城者何東周也地理志王城本邾鄆之地是以或謂之邾鄆故春秋傳曰成王定鼎于邾鄆是也今河南邾鄆東門名鼎門蓋九鼎所徙入也成王既卜營洛邑建明堂朝諸侯復還

豐鎬故書序曰成王既黜殷命還歸在豐至懿王徙太丘秦謂之廢丘今京兆槐里是也

世本曰懿王居太丘厲王淫亂出居于彘今河東永安是也平王即位徙居洛邑洛誥所謂新邑也國語曰幽王滅周乃東遷本殷之畿內有禹貢豫州之域河洛瀍澗之間周於南柳七星張之分鷄火之次也及敬王避子朝之亂東居成周故春秋經曰天王入于成周是也後六年王室定遂徙都成周是後晉又率諸侯之徒修繕其

城以成周城小不受王都故壞翟泉而廣焉翟泉地在成周東北今洛陽城中有周王塚是也至赧王又徙居西周而失位

又曰秦非子始封於秦故秦本紀稱周孝王曰朕其分土為附庸邑之秦今隴西秦亭是也玄孫莊公徙廢立周懿王之所都今槐里是也及襄公始受豐之地列為諸侯文公徙汧秦本紀曰文公東獵至汧乃卜居之今扶風郿縣是也寧公又都平陽故秦本紀曰寧公二年徙居平

陽今扶風郿之平陽亭是也秦本紀又有曰德公元年
初居雍今扶風雍是也至獻公即位徙治櫟陽今馮翊
萬年是也孝公自櫟陽徙咸陽秦本紀曰作為咸陽築
翼闕徙都之漢元年更名新城元鼎三年復別謂渭城今長
安西北渭水陽有故城故西京賦曰秦里其朔實為咸
陽是也

又曰漢高帝元年始為漢王都南鄭屬漢中秦厲公所
置在禹貢梁州之城北達秦雍南跨巴蜀與秦同分二年

北徙櫟陽故秦獻公之所居後居萬年故屬馮翊今京兆縣也都長安秦咸陽之地今京兆所治縣也其城狹小至惠帝元年始更築廣五年乃成光武以武信侯進封蕭王在禹貢徐州之域於周以封子信之別附庸事在春秋於漢屬豫州今沛國蕭是也及即位於鄆更名高邑建武元年始都洛陽故成周之舊基城東西六里一十步南北九里一百步是以時人謂洛陽為東京長安為西京

又曰魏武為魏公都鄴今魏郡是後文帝因漢之舊復都洛陽以譙為先人本國許昌為漢之所居長安為西京之遺跡鄴為王業之本基與洛陽凡五處故號曰五都

博物志曰河東平陽堯所都河東蒲阪虞所都

又曰潁川陽翟禹所都

又曰河南偃師尸鄉湯所都

又曰魯國薛奚仲所都河南洛陽周公遷殷民曰成周

河南武王遷九鼎周公營之以為王城平王所都

又曰河南鞏東周所都

又曰扶風槐里周懿王所都

又曰扶風郃邑幽鄉公劉所都

又曰扶風馮翊櫟陽秦獻公所都

又曰扶風雍秦惠王所都

晉書云晉都洛陽至永嘉南遷居建康今潤州江寧縣
宋齊梁陳並同居建康梁元帝及後梁蕭詧又別居江

陵永嘉之亂有十六國各建都邑前涼張軌都燉煌後涼呂光都姑臧後涼秃髮烏孤都洛陽西涼李暠都酒泉北涼沮渠蒙遜都張掖前燕慕容廆初都和龍後徙薊又徙鄴後燕慕容垂都中山南燕慕容德都廣固北燕馮跋都和龍前秦苻堅後秦姚萇並都長安西秦乞伏國仁都定樂前趙劉聰都平陽後趙石勒都襄國至石季龍都鄴後蜀李特都成都夏赫連勃勃都統萬城又曰永嘉南遷後魏據中原初都代又徙洛陽至文帝

遷長安孝靜帝遷都鄴號東魏西魏東魏禪於北齊高
洋以鄴為上都晉陽為下都西魏禪周周禪隋並都長
安隋高祖營大興城後徙居之名曰長安今西京也隋
煬帝遷洛陽於故周之王城對伊闕即今東都地也

太平御覽卷一百五十五

欽定四庫全書

太平御覽卷一百五十六

宋 李昉等 撰

州郡部二

叙京都

叙京都下

史記曰婁敬齊人因齊人虞將軍見上說曰陛下都維
陽豈欲與周室比隆哉上曰然敬曰陛下取天下與周

室異周自后稷堯封之邵積德累善十有餘世成王即位而營雒邑以為此天下中也貢職道里均有德易以王無德易以亡凡居此者欲令務以德致人不欲依險阻今後世驕奢以虐人也今陛下與項藉戰滎陽爭成臯大戰七十小戰四十使天下之人肝腦塗地暴骨中野欲與成康比隆臣以為不侔矣夫秦被山帶河四塞之固夫與人鬪不搯其喉拊其背未能全勝上疑之及留侯言之工即日車駕西都賜敬姓劉氏拜郎中號奉

春君

漢書曰劉敬說上都關中上疑之左右大臣皆山東人多勸上都雒陽曰雒陽東有成臯西有嶠函背河向雒其固亦足恃張良曰雒陽雖有此固其中小不過數百里田地薄四面受敵此非用武之國夫關中左嶠函右隴蜀沃野千里南有巴蜀之饒北有胡苑之利阻三面而獨守以一面東制諸侯安定河渭漕輓天下西給京師諸侯有變順流以下足以委輸此所謂金城千里天

府之國劉敬說是也上即日車駕西都關中

又曰秦中形勢之國也地勢便利以下兵於諸侯譬如

高屋之建瓴水也

又曰翼奉上書曰天道有常王道亡常亡常者所以應

常也必有非常之主然後能立非常之功臣願陛下徙

都於成周左據成臯右阻澠池前鄉崧高後界大河

師古曰鄉

讀曰嚮介
腸也碍也

建滎陽扶河東南北千里以為關而入敖倉

地方里者八九足以自娛東厭諸侯之權西遠胡羌之

難師古曰厭抑也音一葉反遠音于萬反陛下恭已亡為按成周之居無

盤庚之德萬歲之後長為高宗

後漢書建武元年冬十月癸丑車駕入洛陽幸南宮却

非殿遂定都

洛陽宮南有却非殿

又曰時京師修起宮室濬繕城隍而關中耆老猶望朝

廷西顧班固感前代相如壽王東方之徒造構文辭終

以諷勸相如作上林子虛賦吾丘壽王作士大夫論及駢駢將軍頌東方朔作客難及非有先生論其

辭以諷喻為主也乃上兩都賦盛稱洛邑制度之美以折西賓

淫佚之論

又黃琬傳董卓秉政以琬名臣徵為司徒遷太尉卓議
遷都長安琬與司徒楊彪同諫不從琬退而駁議之曰
昔周公營洛邑以寧姬光武卜東都以隆漢天之所啟
神之所安大業既定豈妄有遷動以虧四海之望也

又曰杜篤以關中表裏山河先帝舊京不宜改營洛邑
乃上奏論都賦

又曰王景建初七年遷徐州刺史先是杜篤上論都賦

欲令車駕遷還長安耆老聞者皆動懷土之心莫不眷
然佇立西望景以宮廟已立恐人情疑惑會時有神雀
諸瑞章帝時有神雀鳳
凰白鹿白鳥等瑞乃作金人論頌洛邑之美天人
之符文有可採

又曰陳紀遷侍中出為平原相謁董卓時欲徙都長安
乃謂紀曰三輔平敞四面險固土地肥美號為陸海今
關東兵起恐洛陽不可久居長安猶有宮室今欲遷何
如紀曰天子有道守在四夷左傳
之文宜修德政以懷不附

遷移至尊誠計之末者愚以公宜事委公卿專精外任
其有違命則威之以武今關東兵起民不堪命若謙遠
朝政率師討伐則塗炭之民庶幾可全若欲徒萬乘以
自安將有累卵之危崢嶸之險也卓意甚恨而敬紀名
行無所復言

吳錄曰張紘言於孫權曰秣陵楚武王所置名為金陵
秦始皇時望氣者云金陵有王者氣故掘斷連岡改名
秣陵有別小江可以貯船宜為都邑遂自京口遷都

吳志先是有童謠云寧飲建业水不食武昌魚寧歸建

業死不就武昌居於是吳主乃遷都建业

按江表傳漢建安中蜀主

曾宿於秣陵觀江山之秀勸帝居之初張紘常謂帝曰秣陵都楚威王所置名為金陵其地岡阜綿綿連營訪問故老云昔秦始皇東遊會稽曾改名此縣望氣者云金陵地形有王者都邑之氣故掘斷東岡改名秣陵今即所見其地有其氣象天之所會實宜為都邑帝深善之後聞蜀主語曰智者意同按吳錄蜀主曾使諸葛亮至京口觀秣陵山阜歎曰鍾山龍盤石頭虎踞帝王之宅

晉書成都王穎以周馥為河南尹馥觀洛陽孤危乃建策迎天子都壽春曰不圖厄運戎狄交侵畿甸危逼僉

以啟人有屢遷之事周王有岐山之徙方今河朔蕭條
嶠函阻泄宛都屢敗江漢多虞淮陽之地北阻險山南
枕靈岳名州四帶有重險之固運漕四通無屢空之艱
雖聖上神聰元輔明賢居儉守約用保宗廟未若相土
遷宅以保永祚也

載記曰劉元海之僭太史令宣于脩之言於元海曰陛
下鳳翔龍興奄受大命然皇居仄陋非可久安平陽勢
有紫氣燕陶唐舊都願陛下上迎乾象下協坤祥乃遷

都平陽又石勒下令曰武都吾之豐沛萬歲之後覓魄歸之初張賓謂勒曰今天下鼎沸戰爭方始夫得地者昌失地者亡邯鄲襄國趙之舊都依山憑險形勝之國可擇此二國而都之然後命將四出授以竒略推亡固存兼弱攻昧王業成矣遂據襄國又苻堅自臨晉登龍門願謂羣臣曰美哉山河之固婁敬有言關中四塞之國真不虛矣權翼對曰臣聞夏殷之都非不險也周秦之衆非不多也終於身殞南巢首懸白旗軀殘於犬戎

國分於項藉何也德不脩故耳吳起有云在德不在險願陛下守之以德山河之固不足恃也

江表傳曰孫皓欲徙都武昌百姓沿流供給殊以為患陸凱上疏曰臣聞有道之君以樂樂人無道之君以樂樂身樂人者其樂彌長樂身者不久而亡民者國之根也誠宜重其食愛其命民安則君樂矣又武昌土地危險磽确非王者建都安國養民之處船泊則沈漂陵居則峻危且童謠曰寧飲建業水不食武昌魚寧還建業死

不就武昌居臣聞翼星為祥熒惑作妖童謠之言發自
天心也

後魏書孝文帝太和十八年遷都鄴登銅雀臺魏御史大
夫崔吉等曰鄴城平原千里運漕四通有西門吳起舊
迹可致饒富在德不在險請都之孝文曰君知其一未
知其二鄴城非常久之地石虎傾於前慕容滅於後國
富主奢逞暴速敗且西有枉人山東有列人縣北有柏
人城君子飲盜泉惡其名也遂止乃都洛陽

三國典略梁元帝在江陵即位欲還都建鄴領軍將軍胡僧祐太府卿黃羅漢吏部尚書宗懔御史中丞劉歊等曰建鄴氣已盡與虜止隔一江若有不虞悔無及也且渚宮洲數滿百當出天子陛下龍飛是其應也梁主令朝臣議之黃門侍郎周弘正尚書左僕射王褒曰帝王所都本無定處其如黔首萬姓未見輿駕入建入建鄴謂是列國諸王宜順百姓之心從四海之望時江陵人士咸云弘正東人志願東下恐非良計弘正折之曰若東人

勸東謂為非計君等欲西豈成良策梁王笑之於後堂
會文武五百人曰吾欲還建鄴諸卿以為何如眾皆愕然
莫敢先對梁主曰勸吾者去左袒於是左袒者過半
武昌太守朱買臣入勸梁主云建鄴舊都瑩陵猶在荆
鎮邊疆非王者宅願陛下弗疑致後悔也臣家在荊州
豈不願陛下住但恐是臣富貴非陛下富貴耳乃名卜
者杜景象決其去留遇兆不吉答云未吉景象退而言
曰此兆為鬼賊也

五經要義曰王者受命創始建國立都必居中土所以
總天地之和據陰陽之正均統四方以制萬國者也

王嬰古今通論曰崑崙東南方五千里謂之神州州中
有和美鄉方三千里五岳之城帝王之宅聖人所生也
鹽鐵論曰燕之涿薊趙之邯鄲魏之温軹韓之滎陽齊
之臨淄楚之宛陳鄭之陽翟三川之二周富冠海內皆
為天下之名都

世說曰謝公時兵卒廝養連亡多竄在南塘下諸船中

或欲求一時搜索謝公不許云不容致此輩何以為京師

譙周法訓曰王者居中國何也順天之和而同四方之統也

管子曰凡立國都非大山之下必廣川之上高無近旱而水用足下無近水而溝防省因天材就地利故城郭不必中規矩道路不必中準繩

山海經曰青要之山實惟帝之密都

又曰帝之下都崑崙之墟

又曰從極之都三百仞唯馮夷都焉

馮夷河伯

尸子曰舜一徙成邑二徙成都三徙成國堯聞賢之舉之草茅之中與之語禮樂不逆與之語政至簡而易行與之語道廣大而不窮於是妻之以皇媵之以英九子事之而託天下焉

帝王世紀曰古公亶父是為大王以修德為百姓所附狄人攻之以皮幣事之不得免焉又事之以玉帛不得

免馬又事之以犬馬不得免馬遂策杖而去止於岐山之陽邑於周地故始改國曰周幽人聞之曰仁人不可失也東循而奔從之者如歸市焉一年而成三千戶之邑二年而都成三年五倍其初王於是改戎俗築城郭立宗廟設官司即詩所謂乃召司空乃召司徒俾立室家其繩則直是也周道之隆蓋自此始

兩京記曰隋文帝開皇二年以長安故城漢來舊邑彫殘日久今之宮室事近權宜不足建皇王之邑謀欲遷都

僕射蘇威等議合帝旨太史令庾季才奏當遷都帝曰
吾乃今知天道開皇二年六月十八日移入新邑在漢
故城之東南萬年縣界南直終南山子午谷北枕龍首
原今朝堂即舊楊興村村門大樹今見在初周代有異
僧名張公言詞多驗時村人於此樹下集張公忽來逐
之曰此天子坐位何故坐左僕射高穎總領其事太子
右庶子宇文愷創製規模謂之大興城隋文初封大興
公及登極縣門園池多取其名宮城東西五里南北二里

四十步週迴十三里一百八十步高三丈五尺

又曰東都城隋大業元年自故都移於今所其地今周之玉城自周敬王後漢並居於今故都至仁壽四年隋文帝營建於此初謂之東京有詣闕言事者稱一帝二京事非稽古乃改為東都為王世充所據世充改為洛州總管府尋又置陝東大行臺武德九年復為洛州都督府貞觀六年勅改東都舊宮為洛陽宮顯慶元年復為東都武太后號為神都神龍元年復舊又改為河南府洛水

貫都有河漢之象初隋煬帝登北邙山觀伊闕顧曰此龍門耶自古何為不建都於此僕射蘇威對曰自古非不知以候陛下帝大悅蓋其地北據山麓南望天關水木滋茂川原形勝自古都邑莫有比也

又曰太宗車駕始幸洛陽宮唯因舊宮無所改製終於貞觀永徽之間荒蕪虛耗置都後方漸修補龍朔中詔司農少卿韋機更繕造高宗嘗謂韋機曰兩京朕東西二宅來去不恒卿宜善思修建始作上陽等宮至武太后

遂定都於此日加營構而官府備矣

郡國志廬山在柴桑彭澤二縣之交疊障九成崇巖萬仞山海經所謂天帝都

揚雄蜀都賦曰蜀都之地古曰梁州

張衡南都賦曰於顯樂都既麗且康陪京之南居漢之陽

魯都賦曰彼齊諸儒散佩垂紳金聲玉色溫故知新訪魯都之區域弔先王之遺貞

左思蜀都賦曰蓋兆基於上世開國於中古廟靈闕以
為門包玉壘而為宇

左思魏都賦曰魏地者畢昴之所應虞夏之餘人先王之桑梓
列聖之遺塵考之四隈則八紘之中測之寒暑則霜露所均
後漢杜篤論都賦非夫大漢之盛代藉雍土之饒得御外
理內之術孰能致功若斯故創業於高祖嗣傳於孝惠德
隆於太宗財衍於孝景威盛於聖武政行於宣元侈極
於成哀阼缺於孝平傳代十一歷載三百

高祖至平帝
十一代歷涉也

合二百一十四年此言三百者謂出二百年涉三百年德衰而復盈道微而復彰

謂呂氏亂而文帝興皆莫能遷於雍州而背於咸陽宮

昌邑廢而宣帝中興室寢廟山陵相望高顯弘麗可思可榮羲農已來無茲

著明夫雍州本帝皇所以育業周始祖后稷封邵公劉居幽太王居岐文王居

鄴武王居鎬並在關中故曰育業也霸王所以衍功戰士角難之場也衍廣

也謂秦都關中也



太平御覽卷一百五十六

欽定四庫全書

子部
太平御覽卷一百
五十七至
六十二

詳校官中書臣金應琦

員外郎臣牛稔文覆勘

總校官降調編修臣倉聖脈

校對官助教臣胡予襄

謄錄監生臣李椿

欽定四庫全書

太平御覽卷一百五十七

宋 李昉等 撰

州郡部三

叙州

叙郡

叙縣

邑 知堂 間
里 坊 鄰 附

叙州

釋名白州注也郡國所仰注

說文曰州疇也疇其土而生之也

河圖括地象曰長城者為州

又曰崑崙東南地方五十里名神州中有五山帝王居之
又曰天有九道地有九州天有九部八紀地有九州八
柱

河圖曰九州殊題水泉剛柔各異青徐角羽集寬舒遲
人聲緩其泉鹹以酸荆揚角徵會氣漂輕人聲急其泉
酸以苦梁州商徵接剛勇漂人聲騫其泉苦以辛兗豫

宮徵合平靜有慮人聲端其泉甘以苦雍冀合商羽端
駃烈人聲捷其泉辛以酸

尚書舜典曰肇十有二州

范寧注曰禹平水土置九州
舜爲冀州廣大分爲并州燕

置幽州分齊爲營

州始爲十二州

咸有一德曰以有九有之師爰革夏正

九有者九州也

尚書大傳曰古之處師八家而爲隣三隣而爲朋三朋
而爲里五里而爲邑十邑而爲都十都而爲師州有十

師焉

鄭玄注曰州凡四十三萬
二千家此蓋虞夏之數也

毛詩商頌曰帝命武于九圍

九圍九州也

詩含神霧曰邺鄘衛王鄭此五國者千里之域處州之

中名曰地軸

周禮地官大司徒曰五黨爲州使之相調

鄭玄注曰州二千五百家

調其困乏五州爲鄉使之相賓

又周禮春官保章氏以星土辨九州之地所封之域皆有分星以觀妖祥

又夏官職方氏曰職方氏掌天下之圖以掌天下之地

辨其邦國都鄙

天下之圖如今司空輿地圖

乃辨九州之國使同貫

利

貫事也

禮記王制曰凡四海之內九州州方千里

春秋說題辭曰州之言殊也合同類異其界也

爾雅曰兩河間曰冀州

自東河至西河

河南曰豫州

自河南至漢也

河

西曰雍州

自河西至黑水

漢南曰荊州

自漢南至衡山之陽

江南曰揚州

自江至南海也

濟河間曰兗州

自河東至濟也

濟東曰徐州

自濟東至海也

燕

曰幽州

自易水至北狄

齊曰營州

自岱東至海也

孝經援神契曰計校九州之別土壤山陵大川澤所注

萊沛所生鳥獸所聚九百十一萬八千二十四頃

言民少不

足以盡地利萊沛水傍沮洳不可耕者

磽确不墾者其餘提封千五百萬

二千頃

論語摘輔象曰兗豫屬上台

九州繫三台

荆揚屬下級

下級上之

下等一台各有上下

梁雍屬上中

中台上

冀州屬下級

錯雜也屬中台之下下台

上之青州屬下上

下台上

徐州屬下下

下台之下也

五經異義曰地有九州足以承天

史記曰鄒衍云中國於天下乃八十一分居其一分名曰赤縣神州赤縣神州內自有九州禹之序九州是也不得為州數中國外如赤縣神州者九乃所謂九州也於是有裨海環之人民禽獸莫能相通如一區中者乃為一州如此者九乃有大瀛海環其外天地之際焉

後漢書曰獻帝建安十八年復禹貢九州

獻帝春秋曰時省幽并州

以其郡國併於冀州省司隸校尉及涼州以其郡國併於雍州省交州併荊州益州於是有兗豫青徐荆揚冀益雍也九數雖同禹貢無益州有梁州然梁益亦一地也

又曰順帝時李同上書曰夫天下之大譬之一人之身
本朝者心腹也州郡者四支也心腹病則四支不舉故
臣之憂在心腹之疾非四支之患

應劭漢官儀曰孝武皇帝南平百越北攘戎狄置交阯
朔方之州復徐梁之地改雍曰梁改梁曰益凡十三州
所以交朔獨不稱州明示帝王未必相襲始開地方遂
交南方為子孫基址也

漢官改詁曰冀趙常山

胡廣注曰經曰冀州既
載居趙國今治常山

究衛濟

河

經曰濟河惟兗州
衛國今治山陽

青齊海岱

經曰海岱惟青州
居齊國今治馬

徐魯

淮沂

經曰海岱及淮惟徐州又曰淮沂
其又居魯國今居豫州而治東海

揚吳彭蠡

經曰
淮海

惟揚州又曰彭蠡既

居吳國今治九江

荆楚衡陽

經曰荆及衡陽惟荆
州居楚國今治武陵

益

庸岷梁

經曰華陽黑水惟梁州漢
改梁州為益州今治廣漢

涼邠黑水

經曰黑水
西河惟雍

州居邠國漢改雍州為邠州國右扶風
其邑縣屬司隸部不復屬州今治漢陽

雍別朔方

漢別
雍州

之地置朔
方刺史

交趾南越

漢平南越之地置交趾
刺史別諸州治蒼梧

幽燕朝鮮

經無幽州而周官有馬蓋冀
之別也居燕國今廣陽是

并代晉翟

經無并州而周
官有蓋州之別

也居燕國
今廣陽是

淮南子曰天地之間九州八柱

又曰九州大統方千里九州之外乃有八墳亦千里

又曰何謂九州東南神州曰農土

東南農土后稷所經緯也故曰神州也

正南次州曰沃土

沃盛也五月建午稼穡長故曰沃土

西南戎州曰滔土

滔大也七月建申萬物壯大故曰滔土

正西兗州曰并土

并猶成八月建酉百穀成熟故

也曰井 正中冀州曰中土

冀大也為四方內主故曰中土

西北台州曰肥

土正北濟州曰成土

說未聞

東北薄州曰隱土

薄猶平也陰氣所隱

伏也故曰隱土

正東揚州曰申土

申復也陰氣盡伏東北陽氣復起東方故曰申土

輿地志曰周成王之時周公作輔定官分職改禹九州以徐梁合之青雍分冀州之域爲幽并二州

風俗通曰周禮五爲州州疇也州有長使之相調是也物理論曰九州變易交錯不同禹貢有梁州周官有并州爾雅有營州無青州漢興武帝開拓三方立十三州通并梁之數而增益焉

太乙式占周公城名錄曰黃帝受命風后受圖割地布九州置十二圖

張衡靈憲曰崑崙東南有赤縣之州風雨有時寒暑有節苟非此州南則多暑北則多寒東則多陽西則多陰故聖王不處焉

敘郡

釋名曰郡羣也人所羣聚也秦改諸侯置郡縣隨其所
在山川土形而立其名

苗恭十四州記曰秦始皇廢五等之爵立郡縣之官以
公國為大郡以侯伯為小郡大郡曰守小郡曰都尉

漢書地理志曰漢孝平時凡郡國一百三十二侯國二百四十一

又曰六郡者金城隴西天水安定北地上郡也

續漢書郡國志曰光武中興命併省郡國明章和至於順帝凡郡國一百五仍爲十三郡

又曰光武以官多役煩乃併省郡國十凡縣道侯國四百餘所後爲十三州部司隸理河南今洛陽豫州理洛陽

毫兖州理昌邑今兖州金鄉縣徐州理剡今泗州下邳縣青州理臨淄

今青州

涼州理隴

隴城縣

并州理晉陽

太原

冀州理鄆

音邨今趙州高邑縣

幽州理薊

薊縣

揚州理歷陽

和州

荊州理

漢壽

今朗州武陵縣

交州理廣信

梧州蒼梧縣

至於末加置郡國百

有五凡縣道侯國千一百八十東有樂浪郡西有燉煌

郡南有日南郡北有雁門郡西有永昌郡廣袤如前漢

通典曰秦始皇帝併天下分置三十六郡

三十六者三川河南東陽

南郡九江潁郡會稽潁川碭郡泗水薛郡琅琊齊郡上谷漁陽右北平遼西遼東代郡鉅鹿邯鄲上黨太原雲

中九原鴈門上郡隴西北地漢中巴郡蜀郡黔中長沙凡三十五與內史爲三十六郡

郡各領縣

縣萬戶已上為令減萬戶為長平百越又置西郡

關中南海桂林

象郡合四十郡郡置一守一丞兩尉以典之監侍御史掌監

諸郡漢有天下王侯郡國並置焉迄於平帝戶口繁劇

凡新置郡國六十七與秦三十六合一百三改周雍州

曰涼州復置夏之徐梁三州而改梁曰益北置朔方南

有交趾別置二刺史凡十三部

京益荆揚青豫兗徐幽并冀十一州交趾朔方

二刺史合十三部刺史十三人各掌一州

括地志曰魏武輔政吳蜀三方鼎峙疆場不定建安中

置郡十二

新興樂平西平新平略陽陰平帶方譙郡樂陵章武南陽襄陵等是也又省上郡朔方五

原雲中定襄漁陽廬江等七郡

文帝受禪又置七郡

朝歌陽平弋陽魏興新城義陽安豐

也 明帝置六郡

平公孫度得遼西遼東帶方玄菟樂浪又置上庸一郡

少帝又置

平陽一郡并得漢舊郡國五十四蜀得二十郡

先主初置九郡

巴東巴西梓潼江陽汶山漢嘉朱提雲南涪陵并得漢舊巴郡廣漢犍為梓潼越巂益州漢中永昌南安武都

也 晉太康平吳之後天下一統

平吳得州四交廣荆陽也郡四十三

凡州

十六

太康地記曰司冀兖豫荆揚徐青幽并雍梁涼益交廣也

晉自湯陰敗後羌

羯交侵至於劉曜陷洛陽於是司冀雍涼青并豫幽平

秦營十二州並淪沒矣後魏漢文帝都洛陽開拓土宇
明帝熙平元年凡州六十八至武定年凡州一百一十
郡五百一十九周明帝受魏禪至大象二年凡州二百
一十一隋文帝受周禪至開皇三年罷天下郡其縣但
隸州而已九年平陳已後四海一家大業三年罷州爲
郡四年大簿凡郡國一百八十三唐貞觀十三年大簿
凡州府三百五十八叙之為十道

應劭漢官儀曰秦用李斯議分天下爲三十六郡凡郡

或以列國陳魯齊吳是也或以舊邑長沙丹陽是也或以山泰山山陽是也或以川原西河河東是也或以所出金城城下有金酒泉泉味如酒豫章章樹生庭中鴈門鴈之所育是也或以號令禹合諸侯大計東治之山會稽是也京兆絕高曰京京大也十億曰兆欲令帝都殷盈也左輔右弼蕃翊承風也張掖始開垂張臂掖也

苗恭十四州記曰秦兼天下始皇二十六年廢五等之爵立郡縣之官以公國爲大郡侯伯爲小郡大郡曰守小郡

曰都尉改公侯之封而言郡郡者君也君至尊也言郡守專權君臣之禮更崇也今之郡字君在其左邑在其右君爲元首邑以載民故取名於君而謂之郡也

風俗通曰周制天子方千里分爲百縣縣有四郡故左氏傳曰上大夫受縣下大夫受郡

敘縣

釋名曰縣懸也懸係於郡也

說文曰縣邑也

周書曰交田方六百里因四方爲千里分以百縣縣有四郡郡有鄙鄙不過百室以便野事

周禮地官遂人曰五家爲隣五隣爲里五里爲鄩五鄩爲鄙五鄙爲縣五縣爲遂

禮記王制曰天子之縣內方百里之國九七十里之國

凡二十有一五十里之國六十有三凡九十三國

縣內
夏時

天子所居
州界也

苗恭十四州記曰縣萬戶以上爲令則子國也千戶爲

長男國也今人呼縣爲百里之男本方百里也故言今之百里古之諸侯

又曰縣者紘也言施繩用法狀如紘聲近縣故以取其名

風俗通曰周禮百里曰同所以樊王室協風俗總名縣縣玄也言當玄靜平徭役

邑附

尚書大傳曰五里爲邑

周禮地官曰四井爲邑

易訟卦曰逋其邑人三百戶

周書曰周公乃作大邑于成周

左傳曰凡邑有宗廟先君之主曰都曰邑

穀梁傳曰齊人取子糾殺之十室之邑可以隱死以千乘之魯而不能存子糾公爲病矣

論語曰十室之邑必有忠信如丘者焉不如丘之好學也

史記曰黃帝邑于涿鹿之阿遷徙往來無常處以師兵
為營衛

張華詩曰駕言遊東邑東邑紛穰穰婚姻及良時嫁娶
避當梁

鄉附

釋名曰鄉向也衆所向也

周禮地官司徒曰五州為鄉使之相賓

論語曰孔子於鄉黨恂恂如也似不能言者

又曰互鄉難與言童子見門人惑

後漢書曰張湛爲左馮翊告歸平陵望寺門而步主簿
進曰明府位尊德重不宜自輕湛曰禮下公門軾路馬
孔子於鄉黨恂恂如也父母之國所宜盡禮何爲輕哉
唐書曰張道源并州祁人也年十五父死居喪以行孝
稱縣令郭湛改其所居爲復禮鄉至孝里

老子曰以鄉觀鄉

莊子曰遊於無何有之鄉

鄭玄別傳曰國相孔文舉教高密縣曰公者人德之正號不必三事大夫也今鄭君鄉宜曰鄭公鄉

黃公交廣記曰秦兼天下改附庸爲鄉鄉則有族今嗇夫是也鄉之言境言其在人境域內非天王所置故言鄉

零陵先賢傳曰鄭產泉陵人爲白土嗇夫漢末產子一歲輒出口錢民多不舉產乃救民勿得殺子口錢自當代出因名其鄉曰更生鄉

萬歲歷曰黃帝六年正月獲彭綺是歲由拳西鄉人產
兒墮便語云天方明河欲清鼎脚折金乃生於是因曰
語兒鄉

郡國志曰秭歸縣屈原鄉里南岸曰歸鄉西岸曰秭歸
屈原薨歸鄉里因曰歸鄉曰屈原姊女嬃聞原還亦來
喻之因曰姊歸也

王子年拾遺記曰張掖郡邛奇字君珍居喪盡禮以淚
灑石石即成痕著枯木枯草在冬必茂浸地成鹹俗謂

之誠鄉漢帝嘉其孝異表銘其邑改曰孝行之鄉歲時
使立廟祭祀

黨附

周禮地官司徒曰四閭爲族使之相葬五族爲黨使之
相助

釋名曰五百家爲黨黨長也一聚所尊名也

六韜曰友之友謂之朋朋之朋謂之黨黨之黨謂之羣

閭附

周禮地官司徒曰五家爲比使之相保五比爲閭使之相愛

說文曰閭里門也周禮謂比爲閭閭侶也二十五家相羣侶也

尚書曰武王克商式商容閭

范曄後漢書曰袁忠子秘爲郡門下義生黃巾起秘從太守趙謙以侍繫之軍敗秘與功曹封觀等七人以身扞刃皆死於陣謙以得免詔復秘等閭號曰七賢閭

戰國策曰王孫賈年十五齊閔王出走失王之處其母曰汝朝出而晚來則吾倚閭而望

又曰齊桓公宮中七市女閭七百管仲故爲三歸之臺以掩桓公之罪

呂氏春秋曰魏文侯過段干木之閭而式之

里附

周禮地官遂人曰五家爲隣五隣爲里

風俗通曰里者止也五十家共居止也

禮記曲禮上曰里有殯不巷歌

春秋潛譚巴曰里社鼓自鳴此里有聖人

論語曰里仁爲美

又曰東里子產潤色之

論語撰考識曰里名勝母曾子斂襟

漢書曰禮古經者出魯淹中

蕪林曰里名也

又曰盧綰與高祖同里閭

又曰宣帝舍長安尚冠里

東觀漢記曰鮑永字君長爲魯平太守時彭豐等不肯
降後孔子闕里無故荆棘自闕從講室掃除至孔里永
異之召郡府丞謂曰方今阨急而闕里無故自滌意豈
夫子欲令太守大行饗誅無狀也乃修學校理請豐等
會手格殺之

張璠漢記曰荀爽兄弟八人時人謂之八龍舊居西豪
里縣令苑康曰昔高陽氏有才子八人今荀氏亦有子
八人因改其里曰高陽

宋書曰太原王知玄者僑居會稽郟縣居家以孝聞及
丁憂哀毀而卒帝嘉之改所居青苔里爲孝家里

宋畧曰張敷幼樹風規貞心簡立居喪滅性孝道淳深
宜追甄異以旌厥里改所居里曰孝張里

又曰散騎常侍袁瑜薦會稽郭世道詔改所居曰孝行
里

又曰太祖十三年春鳳凰見于京師衆鳥隨之改其地
曰鳳凰里

唐書曰劉禕之貞觀元年詔追入京以母老固辭太宗許其終養江南道大使龔譽嘉其至孝賜以米帛因上表旌其門閭改所居為孝慈里

典畧曰衛襄字叔遼河東人也修行至孝州郡嘉之改其里謂之孝德里

晉宮閣名曰洛陽城中諸里年和里宜壽里永年里宜都里太學里富儲里德官里大雅里孝敬里永安里安城里左池里東臺里安民里延壽里日中里步廣里西

國里東半里穀陽里北恢里安武里孝西里太始里光
林里石市里宜秋里葛西里西河里宣賜里延壽里攸
陽里南孝里中恢里宜年里渭陽里利名里西樂里北
溪里西義里東統里宣都里石羊里中安里右池里

潘岳西征賦曰所謂尚冠修城河棘宣明建陽昌陰北
煥南平皆夷漫滌蕩亡其處而有其名注云皆里名也
杜祭酒別傳曰桓宣武館於赤欄橋南曰延賢里

荊州記曰峴山南至宜城百餘里舊說其間雕牆崇峻

漢靈帝末其中有卿士刺史二千石數十人朱輪駢耀
華蓋接陰會於太山廟荊州刺史行部見其雅嘆其盛
勃縣號爲冠蓋里

荊州圖記曰秭歸縣北有屈原故宅方七頃累石爲屋
其里名樂平里

伏琛齊地記曰臨淄有梧臺里

益州記曰州南蜀時故錦澗也其處號錦里

伍輯之從征記曰譙周云孔子後魯人就冢次而居者

却國志曰齊臨淄縣東有蕩陰里諸葛亮梁父吟云步
出齊城門遙望蕩陰里內有三墳累累皆相似借問
誰家墳田疆古冶子

會稽典錄曰陳囂與民紀伯為隣伯夜竊藩囂地自益
囂見之伺伯去後密枚其藩一丈以地益伯伯覺之慙
惶既還所侵又却一丈太守周府君高囂德義刻石旌
表其閭號曰義里

坊附

漢宮閣名曰洛陽故北宮有九子坊

晉宮閣名曰洛陽宮有顯昌坊修城坊緩福坊延祿坊
休徵坊承慶坊桂芬坊椒房坊舒蘭坊藝文坊

隣附

尚書曰睦乃四隣以蕃王室

毛詩曰洽比其隣

周禮五家爲隣五隣爲里

周易曰東隣殺牛不如西隣之禴祭

左傳僖公曰棄德不祥怒隣不義

又曰棄信背隣患孰恤之

又曰救災恤隣天之道也

又曰親仁善隣國之寶也

又昭元年曰晏子如晉景公使更其宅還而毀之曰諺

曰非宅是卜惟隣是卜

又曰諸侯守在四隣

論語曰孰謂微生高直或乞醯焉乞諸其隣而與之

又曰德不孤必有隣

後漢書曰張霸字伯饒博覽五經諸生孫林劉固段著等慕之皆市宅其傍以就學焉

南史曰宋季雅市宅在呂僧珍宅側呂問宅價曰千一百萬呂怪其貴宋曰一百萬買宅千萬買隣也

物理論曰買宅者先定隣焉

又曰置隣之直貴於買宅也

太平御覽卷一百五十七

欽定四庫全書

太平御覽卷一百五十八

宋 李昉等 撰

州郡部四

河南道上

東京開封府

西京河南府

陝州

東京開封府

元和郡國志曰禹貢兗州之域春秋為鄭戰國為魏都

史記曰魏惠王自安邑徙大梁

今浚儀縣按後漢書大梁城魏惠王所築

漢書曰酈食其說高祖曰陳留天下之衝四通五達之

郊

又曰文帝以皇子武為梁王都大梁後東徙睢陽

注睢陽曰

今宋州也

後漢書曰明帝永平十五年東巡至大梁

春秋後語曰蘇秦去韓之魏說襄王曰大王之地南有

鴻溝陳汝南許郾名陵武陽新都東有淮潁煮棗無疏溝

今在潁今潁州煮棗今曹州宛句地無疏或作無脊未詳所在西有長蛇之地史記作長城之

界今武原縣有長城北有河水卷衍酸棗地方千里田舍廬廡之

數無所不蓄牧人民之衆牛馬之多夜行不絕鞫鞫殷

殷車馬聲也鞫鞫火龍切夫魏天下之強國也王天下之賢王也

郡國志曰東魏孝靜帝以此置梁州周宣帝改爲汴州

以其臨汴水爲名也隋大業十三年州廢以開封浚儀

屬鄭州隋亂陷賊唐武德四年平王世充復置汴州

五代史曰梁開平元年梁祖初開國升汴州爲開封府
建名東京元管開封府浚儀陳留雍丘封丘尉氏六縣
至是割滑州之酸棗長垣鄭州之中牟武陽宋州之襄
邑曹州之戴邑許州之扶溝鄆陳州之太康九縣隸焉
後唐復降爲汴州以宣武軍爲額其武陽長垣扶溝考
城等四縣仍且隸汴州其餘五縣却還本部晉天福中
復升爲東京復以前五縣隸之漢周並因之

太康地記曰豫州之分其人得中和之氣性安舒其俗

阜其人和今俗多寬慢

漢志曰開封逢池在東北或曰宋之逢澤也瓚曰汲郡
古文梁惠王廢逢忌之數以賜民今浚儀是也

史記王稽與范雎言曰先生待我于三亭之南

三亭今屬浚儀

陳留風俗記曰阮簡為開封令時外白有劫賊甚急簡
方圍棋長嘯曰局上劫亦急

徐廣史記音義曰秦孝公會諸侯於蓬澤

圖經曰浚儀有高陽故城顛頊高陽氏佐少昊有功封

於此城

又曰浚儀有信陵亭在城內即魏國公子無忌勝槩之
地

左傳曰韓起送女於楚還過鄭鄭伯勞諸圉

今圉城是也

漢志曰陳留郡鄭邑後爲陳所併故曰陳留瓚曰宋亦
有留彭城留是也留屬陳故稱陳留也

古史考曰伊尹生於空桑陳留有空桑故城

家語曰孔子南遊於楚至阿谷之隧使子貢奉觴從女

子乞飲今陳留阿谷水

漢志曰雍丘屬陳留故杞國周武王封禹後東樓公

左傳曰衛侯伐鄭至于鳴鴈

在雍丘有鳴鴈亭

左傳曰齊桓公會諸侯于葵丘

今在雍丘縣

漢志曰陳留郡東昏莽改曰東明

又曰襄邑屬陳留有服官莽曰襄平師古曰襄邑宋地

本承匡襄陵鄉宋襄公所葬故曰襄陵秦始皇以承匡

卑濕故徙縣于襄陵謂之襄邑縣

陳留風俗傳曰襄邑縣南有睢水渙水傳曰睢渙之水
出文章故有黼黻藻錦日月華蟲以奉天子宗廟御服
焉

左傳曰宣二年鄭破宋師于大棘杜預曰在襄邑

後漢地理志曰陳留郡邑已吾有大棘鄉

國都記云封丘衛地故燕之延鄉也高祖與項羽戰于
延鄉有翟母免其難故以延鄉封翟母焉

漢志曰封丘屬陳留郡孟康曰春秋傳敗翟于長丘今

翟溝是也

漢志曰尉氏屬陳留郡應劭曰古獄官曰尉氏鄭之別獄也瓚曰鄭大夫尉氏之邑遂以爲邑師古曰鄭大夫尉氏亦以掌獄之官故爲族耳

後漢地理志曰陳留郡尉氏有陵樹鄉鄉北有澤澤北有天子苑圃有秦樂廐漢以馴養猛獸

漢志曰外黃屬陳留郡張晏曰魏郡有內黃故加外耳瓚曰縣有黃溝故氏之也

左傳曰惠公敗宋師于黃杜注外黃縣東有黃城

陳留風俗傳曰沛公起兵野戰喪皇妣於皇鄉天下平

定乃使使者以梓宮招魂於野有丹蛇自洒濯入梓宮

其浴處仍有遺髮

其處在小黃屬陳留

漢志曰長垣屬陳留郡莽曰長固

孟康曰春秋會於匡今匡城是

晉地道記曰長垣古衛故匡城地孔子所厄處也

地道記曰承匡城在縣西左傳文十一年會晉卻缺于

承匡是也

漢志曰鄆屬陳留恭曰順通

左傳隱公曰鄭伯克段于鄆

又鄭大叔侵鄭至于廩延注曰縣北有延津後漢地理志曰卽酸棗也

戰國策云齊欲伐辛取周九鼎顏率曰夫梁之君臣欲得九鼎謀於沙海之上爲日久矣

陳留風俗傳曰縣有倉頡師曠城其城有列山吹臺梁

王增築之以爲吹臺

史記曰大梁城有十二門東門曰夷門隱士侯嬴年七十家貧爲大梁夷門抱關者魏公子無忌厚遺之不肯

受

水經曰大禹塞滎陽澤開渠以通淮泗名葭宥渠卽汴渠也漢平帝時河汴決壞後明帝遣使者修治汴渠至隋大業中更令開導名通濟渠引河水入汴口自大梁之東引入泗連于淮至江都宮入于海亦謂之御河

畔築御道植柳煬帝巡幸乘龍舟而往江都自揚益湘
南至交廣閩中公私漕運商旅軸轡相接

隋書曰大業元年以汴水迂曲迴復稍難自大梁城西
南鑿渠引汴水入號通濟渠

西京河南府

十道志曰洛州周之舊都禹貢豫州之域

尚書洛誥曰召公既相宅周公往營成周使來告卜作
洛誥予惟乙卯朝至于洛師我卜河朔黎水我乃卜澗

水東瀝水西惟洛食又卜瀝水東亦惟洛食

言先卜河
北黎水不

吉又卜瀝

之間乃吉

周禮大司徒曰以土圭之法測土深正日影以求地中

日南則景短多暑日北則影長多寒日東則景夕多風

日西則景朝多陰日至之景尺有五寸謂之地中天

之所合也四時之所交也風雨之所會也陰陽之所和

也然則百物阜安乃建王國焉

史記曰午為鶉火周之次自柳九度至張十七度七星

周之分野

周書曰周公將致政乃作大邑于洛北因邙山以爲天下之湊也

孝經援神契曰八方之廣周洛爲中於是遂築新邑營定九鼎以爲王之東都

漢書曰高祖欲都洛陽成卒婁敬求見上曰陛下都洛陽欲與周室比隆哉上曰然敬曰陛下取天下與周室異周之先自后稷積德十餘世公劉避桀居豳太王以

狄伐故去幽之岐國人爭歸之及文王爲西伯武王伐紂
八百諸侯乃不期而會成王即位周公之屬輔相焉乃
營成周於洛邑以爲天下中四方納貢道里均有德則
易以王無德則易以亡凡欲居此者欲務以德致人不
令後世驕奢以虐民也及周之衰乃分爲二天下莫朝
周不能制形勢弱也今陛下用兵取天下百姓肝腦塗
地而欲比隆周室臣以爲不侔矣不如都秦地以問張
良曰洛陽雖險其中不過百里四面受敵此非用武之

國不如都關中婁敬之說是也

博物志曰周在中樞三河之分風雨所起四險之國武王克殷定鼎郊鄩以爲東都

皇甫謐帝王世紀曰周公相成王以豐鎬偏在西方職貢不均乃使召公卜居洛水之陽以即中土

元和郡縣志曰河南府三代皆爲都邑周公營之爲成周秦爲三川郡漢爲河南郡後漢光武都之

左傳曰初平王東遷辛有適伊川見被髮而祭於野者

曰不及百年此其戎乎其禮先亡矣周襄王十五年秦
晉遷陸渾之戎于伊川果驗辛有之言

又曰晉趙鞅納王使汝寬守闕塞服虔曰闕塞南山伊
闕也

史記曰秦武王謂甘茂曰寡人欲通三川以窺周室死
且不朽也

漢志曰雒陽周公遷殷民是為成周春秋昭公二十一
年晉合諸侯於狄泉以其地大成周之城王莽曰宜陽

後漢書曰時天下墾田不以實戶口互有增減詔下郡國檢覆其事而州郡多不均平百姓嗟怨帝見陳留牘上有書視之云潁川弘農可問河南南陽不可問帝怒時顯宗爲東海公年十二言曰吏受郡勅當欲以墾田相方耳帝問曰何故言河南南陽不可問對曰河南帝城多近臣南陽帝鄉多近親

又曰梁鴻登北邙山作五噫之歌曰登彼北邙兮噫覽觀帝京兮噫宮室崔嵬兮噫寥寥未央兮噫人之劬勞

兮噫

魏志曰明帝即位欲平邗山令登觀臺見孟津廷尉辛
毘諫曰天地之性高高下下今而反之既非其理若九
河盛溢洪水爲害丘陵皆夷何以禦之乃止

晉書曰武帝問尚書郎虞摯三日曲水事摯曰漢章帝
時平原徐肇以三月初三生女至三日俱亡一村以爲
怪乃相攜至水邊洗除因流水以盥觴遂以成俗帝曰
若如所說非佳事也尚書郎束皙對曰虞摯小生未究

其本此事起自周公卜成洛邑因流水泛酒故逸詩羽觴波流及秦昭王時三月上巳日置酒河曲遂有金人自泉而出捧水心劍於王曰令君制有西夏此即其處因立爲曲水焉二漢相沿爲盛集帝嘉哲對

隋書曰煬帝命僕射楊素等營構宮室大業元年遂成新都而徙居之今洛陽宮是也

洛陽地圖曰鞏在洛水之間鞏固也言四面有山可以鞏固也

朱超石與兄書曰洛水道路本好青槐映蔭可愛

陸機洛陽記曰洛陽有銅駝街漢鑄銅駝二枚在宮南
西會道相對俗語曰金馬門外集衆賢銅駝陌上集少
年

水經曰伊水東北過伊闕昔大禹疏龍門以通水兩山
相對望之如闕伊水歷其間謂之伊闕

穆天子傳曰天子射鳥有獸在葭中七萃之士高賁戎
擒之以獻天子命畜之東虞曰虎牢唐諱虎故改武其

後又名成臯

十道志曰壽安縣漢宜陽縣也

史記張儀爲秦說韓王曰大王今不事秦秦王中據宜陽斷韓之上地東取成臯滎陽則鴻臺之宮非大王有也

又蘇秦說韓宣惠王曰韓北有鞏成臯之固東有宛穰洧水南有陘山

密縣有陘山

西有宜陽商坂之塞地方九百

里帶甲數十萬

陝州

十道志曰陝州陝郡禹貢豫州之域周爲二伯分陝之地即古號國地戰國時屬韓秦併天下屬三川郡

史記曰周成王時召公爲三公自陝以西召公主之自陝以東周公主之

後漢書曰獻帝東歸至陝議者欲令天子浮河東下太尉楊彪曰臣弘農人從此已下東有六十六灘非萬乘所當從乃止

史記曰芮國在今馮翊界魯桓公三年芮伯萬爲母姜氏所逐遂居于魏

詩曰虞芮質厥成文王蹶厥生毛萇注曰虞芮之君相與爭田久而不平乃相謂曰西伯仁人盍往質焉及入境見行者讓路耕者讓畔咸相謂曰我等小人不可以履君子之庭乃相讓所爭之地以爲閒田天下聞之歸周者四十餘國

唐書曰天寶元年陵鄆太守李齊物鑿三門山路所通

深便於漕運於所開瀆中得古鐸鈕上有古篆平陸二字由是其縣改爲平陸縣

山海經曰夸父之山其北有林名曰桃林廣圍三百里中多馬造父於其中得驂騮耳之乘以獻穆王尚書曰放牛於桃林之野

春秋曰處桃林之野塞

太平御覽卷一百五十八

欽定四庫全書

太平御覽卷一百五十九

宋 李昉等 撰

州郡部五

虢州

汝州

鄭州

宋州

曹州

亳州

單州

許州

陳州

潁州

蔡州

號州

十道志曰號州弘農郡禹貢豫州之域春秋為號地七國時秦韓之境秦為三川郡漢元鼎中置弘農郡

左傳曰晉人以屈產之乘垂棘之璧假道於虞以伐號漢志曰武帝置弘農縣於秦故函谷關山嶺下

戴延之西征記曰函者道形如函也

帝王世紀曰虢有三焉周興封虢仲於西虢此其地也

封虢叔於東虢即成臯是也今陝郡平陸縣是北虢

漢書曰楊僕爲樓船將軍耻爲關外人於是徙關新安
割秦河南南陽二郡之西境於故函谷置弘農郡

漢書郊祀志曰黃帝以首山之銅鑄鼎於荆山之下後
名其地爲鼎湖

郡國縣道記曰盧氏西虢之別也

遁甲開山圖曰盧氏山宜五穀可以避水災因山以名

縣

汝州

十道志曰汝州臨汝郡禹貢豫州之域春秋時爲周王畿及鄭楚之地

十三州志曰戰國時梁屬魏秦置三十六郡屬三川郡漢爲河南郡之梁縣也

左傳昭二十九年傳曰陶唐氏既衰其後有劉累學擾龍于豢龍氏以事孔甲能飲食之夏后嘉之賜氏曰御

龍龍一雌死潛醢以食夏后饗之而使求之懼而遷于魯

縣

即魯山縣也

又曰楚白公之亂葉公率國人攻白公白公奔山縊死

葉公遂邑馬

即今葉縣也

家語曰葉公好龍窓壁背畫龍形真龍爲降葉公見之喪鬼

漢書曰漢王至成臯轅生說漢王曰漢楚相拒滎陽數歲漢常困願王出武關項王必引南走王深壁令滎陽

成臯且休息使韓信等輯河北地連燕齊君王乃復走
滎陽如此則楚所備者多漢得休息王從其計出兵宛
葉間

左傳曰邲晉應韓武之穆也注曰應城在襄城城父縣
西南

韓詩外傳曰周成王與弟戲以桐葉爲珪以封汝周公
曰天子無戲言王應時而封曰應侯今應城是也

鄭州

十道志曰鄭州滎陽郡禹貢豫州之境秦兼天下爲三川郡

帝王世紀曰黃帝都於有熊今新鄭是也

漢志曰新鄭本高辛氏火正祝融之墟

國語曰鄭桓公爲司徒問於史伯曰王室多故余懼及焉何以逃死史伯對曰王室將危戎翟必昌不可福也當成周者南有荆蠻申呂應鄧陳蔡隋唐北有衛燕翟

鮮虞路泉徐蒲

鮮虞姬姓路泉徐蒲皆赤翟隗姓也

西有虢晉隗霍楊

魏芮

八國姬姓也

東有齊魯曹宋滕鄒莒是非王之父子母

弟甥舅也皆蠻夷戎狄之人也非親作頑不可入也其

濟洛河潁之間乎

言此四水之間可逃

是其子男之國虢之國號

鄆爲大

號東號仲之後鄆姬姓

號叔恃勢鄆仲恃險皆有淫侈怠

慢之心加以貪冒君若以周難之故寄孥與賄焉不敢

不許

孥妻子賄財也

周亂如是驕而貪必將背君君若以成周

之衆奉辭伐罪無不克矣克二邑馭弊補丹依彘歷華

君之土也

言克號鄆此八邑可得

若前華後河右洛左濟主朱醜

而食溱洧

朱醜山名主
為神主之也

修典則以守之可以少固公說

乃東孥與賄號鄆受之十邑皆可寄也

後桓公之子武
公竟取十邑之

地而主之今河南新鄭是

十邑謂前八邑及號鄆

韓詩外傳曰鄭國俗以二月桃花下水時會于溱洧之

上以自祓除也故詩曰溱與洧方渙渙兮

漢書曰漢王數困滎陽成臯間計欲捐成臯以東屯鞏

雒以距楚酈食其曰夫敖倉天下轉輸久矣臣聞其下

藏粟甚多楚人拔滎陽不能堅守敖倉此天所以資漢

願足下急進兵攻滎陽據敖倉之粟即天下之所歸矣
晉書曰阮籍嘗登廣武山見劉項戰處嘆曰時無英主使

豎子成名

其地在滎陽也

地道記曰陽武滎陽有博浪沙張良爲韓擊秦始皇處

宋州

十道志曰宋州睢陽郡理宋城縣虞舜十二州爲豫州
之境周爲青州之域武王封微子之邑後爲齊楚魏所
滅三分其地魏得其梁陳留齊得濟陰東平楚得沛梁

即今州也

禮記曰武王克殷下車而封殷之後於宋

禹貢曰導沂澤被孟潞

孟潞澤在今虞城縣

博物志曰宋北至泗水南迄睢渦有孟潞之澤碭山之基

元和郡國志曰秦併天下改爲碭郡後改爲梁國漢文帝封子武爲梁王自漢至晉爲梁國屬豫州宋改爲梁都隋於睢陽置宋州

唐書曰天寶末祿山亂兩河郡縣多所隱沒張巡許遠守睢陽城賊將尹子奇併力攻圍踰年不下城中食盡竟爲賊所陷巡等抗詞不撓遂被害

陳留風俗傳曰宋之地猶有先王遺風重厚多仁好稼穡惡衣食以致蓄藏

史記曰梁孝王築東苑三百里是曰兔園又爲複道自宮屬諸平臺三十餘里

園經曰梁王有修竹園園中竹木天下之選集諸方遊

士各爲賦故館有鄒枚之號又有鴈鷺池周迴四里亦
梁王所鑿又有清泠池有釣臺謂之清泠臺

漢志曰寧陵屬陳留恭曰康善孟康曰故葛伯國今葛
鄉是也

漢書曰梁孝王武以孝文十二年徙梁梁爲大國居天
下膏腴地北界秦山西至高陽四十餘城多大縣於是
孝王築東苑方三百餘里廣睢陽城七十里大治宮室爲複
道自宮連屬於平臺三十餘里

曹州

十道志曰曹州濟陰郡理濟陰縣禹貢豫州之域周爲曹國地後屬宋七國時屬齊漢爲濟陰郡地在濟水之南故以爲名曹詩曰蒼兮蔚兮南山朝濟

左傳僖二十八年曰晉侯圍曹門焉多死曹人尸諸城

上

磔晉死人於城上

晉侯患之聽與人之誦曰移舍於墓

言將發塚

曹人兇懼因其兇也而攻之入曹而分衛之田以賜宋人晉侯有疾曹伯之豎侯孺貨筮史使曰以曹爲解齊

桓公爲會而封異姓今君爲會而滅同姓曹叔振鐸文
之昭也先君唐叔武之穆也且合諸侯而滅兄弟非禮
也公說復曹伯

尚書曰夏師敗績遂伐三醜俘厥寶玉

孔安國曰三醜
國名今定陶也

水經曰河水俗謂之五大溝經定陶

漢書曰高祖五年春三月甲午即皇帝位於定陶汜水
之陽

左傳曰衛孫蒯田于隧飲馬于重丘重丘人毀瓶因詬

之

重丘今
乘氏縣

亳州

十道志曰亳州譙郡置在譙縣禹貢豫州之域春秋時
陳國之譙邑六國時屬楚秦為碭郡地漢為譙縣屬沛
郡

左傳曰楚成得臣帥師伐陳遂取焦夷

杜注焦
今譙國

史記曰周武王封神農之後於譙國

漢書地理志曰王莽以譙為延成亭

魏志曰後漢熹平五年黃龍見譙太史令單颺以爲其國當有王者興不及五十年亦當復見文帝即位果如其言以先人舊都立爲譙國與長安許昌鄴洛陽號爲五都

元和郡國志曰後魏立南兗州周武改爲亳州

魏畧曰太祖於譙東五十里澤中築起精舍讀書射獵
閑絕賓客

史記曰老子苦縣人也

苦縣即今真原縣也

單州

五代史曰單州本單父縣梁爲輝州後唐同光二年復舊隸宋州周廣順中割隸曹州

史記曰宓不齊字子賤爲單父宰反命於孔子曰國有賢不齊者五人教不齊所以治者孔子曰惜哉不齊所治者小所治者大則庶幾矣

呂氏春秋曰宓子賤治單父彈鳴琴身不下堂而單父治

許州

十道志曰許州許昌郡禹貢豫州之域周爲許國

左傳曰許太岳之胤也

說文曰許炎帝之後也武王伐紂時封之也

漢志曰潁川許縣舊許國也

魏畧曰後漢建安元年太祖迎獻帝都於許卽此邑也

魏文帝卽位改許昌縣焉

左傳曰鄭伯請釋泰山之祀而祀周公以泰山之祊易

許田

後漢書曰宋寵爲潁川太守問功曹鄭凱曰聞貴郡山川多產竒秀前賢往哲可得聞乎凱對曰鄙郡稟嵩高之靈中岳之精是以聖賢龍蟠俊乂鳳集昔許由巢父恥受堯禪洗耳河濱重道輕帝邈世高蹈樊仲父者志堅心遐恥山河之功賤天地之重抗節叅雲公儀許由俱出陽城留侯張良竒謀輔世玄冥入微濟生民之命恢帝王之畧功成而不居爵厚而不受出于父城胡元

安體曾參之志行履樂正之純業喪親泣血骨立形存
精神通於神明雉兔集於左右出潁陽彪義山英姿秀
偉逸才挺出究孔子之房奧存文武於將墜出於昆陽
杜伯夷經學見於師門政事熙於國朝清身不苟有於
陵之操損已存公有公儀之節出定陵

又曰獻帝建安元年遷都許

魏畧曰黃初五年文帝東征留郭后於永始臺霖雨百
餘日城樓多壞有司請移后曰昔楚昭王出遊貞姜留

漸臺江水至使者迎而無符不出即沒今帝在遠未有
急禁何移也

又景福殿賦曰鎮以崇臺實曰永始

臺在許昌縣

魏志曰荀彧字文若潁川潁陰人也董卓之亂彧謂父
老曰潁川四戰之地天下有變當爲兵衝宜急去無久
留鄉人皆懷土猶豫會冀州牧韓馥迎彧獨將宗族至
冀州後董卓遣李儒等出關東所過虜掠至潁川鄉人
留者多見殺畧

陳州

十道志曰陳州淮陽郡置在宛丘縣

元和郡國志曰禹貢豫州之域本太昊之墟周武王封
媯滿於陳春秋時楚滅之秦楚屬潁川郡漢高祖分置
淮陽國後漢改爲陳國

毛詩陳風曰坎其擊鼓宛丘之下

又曰東門之池可以漚麻注水經曰東門池水至清而
不耗不生諸草

爾雅曰陳有宛丘又曰丘山有丘爲宛丘

漢書曰高帝十一年立子友爲淮陽王罷潁川郡以益之

七賢傳曰漢武出淮陽到監鄉帝問陳翼曰此名爲何
翼曰監鄉上曰何欺乎翼曰臣言不欺若不欺佩刀當
生白毛若欺則無毛視之刀果有毛

監鄉在
廬江縣

潁州

十道志曰潁州汝陰郡置在汝陰縣

元和郡國志曰禹貢豫州之域春秋胡子國楚滅之秦併天下爲潁川郡在漢則汝南郡之汝陰縣也魏晉於此置汝陰郡後魏改置潁州

毛詩曰遵彼汝墳伐其條枚

史記曰蒙恬伐楚寢丘今汝陰縣有寢丘故城在焉

呂氏春秋曰楚孫叔敖戒其子曰我死王必封汝無受利地荆楚之間有寢丘其地爲不利可長有也其子從之楚功臣封二葉而滅唯寢丘不奪一名沈丘

蔡州

十道志曰蔡州汝陽郡禹貢豫州之地

圖經曰春秋時爲沈蔡二國之地後爲楚魏二國之境
秦兼天下以其地爲三川漢爲汝南郡地形志曰謂之
懸瓠城亦名懸壺城又水經曰水周城形如懸瓠故名
焉

史記曰周武王克殷封叔度於蔡挾武庚作亂周公殺
管叔而放蔡叔與車七乘子胡改行率德周公聞之舉

胡以爲魯卿士故魯國治復封胡于蔡是爲蔡仲

輿地志曰新蔡縣平侯自上蔡徙都之故曰新蔡

漢志曰汝南郡高帝置王莽曰汝汾

又曰鮦陽屬汝郡在銅水之陽也鮦音紂

又曰吳房本房子國也楚靈王遷房于楚吳王闔閭弟夫槩亡犇楚楚封於此爲堂谿氏以封吳故曰吳房

史記蘇秦說韓王曰韓之劍戟出堂谿

又曰李斯上蔡人也二世二年七月具斯五刑論要斬

咸陽市斯出獄與其中子俱執顧謂子曰吾欲與容復牽黃犬出上蔡東門逐狡兔可得乎

後漢書曰許劭字子將汝南平輿人也兄虔亦知名汝

南人稱平輿淵有二龍焉

平輿故城今蔡州汝陽縣東北有二龍鄉月旦里

太平御覽卷一百五十九